

Te Heheuraa Api

E ITE I'A OUTOU I TE PARAU MAU, E NA TE PARAU MAU OUTOU E FAATIAMA

**TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI**

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 2

-- DITEMA 1948 --

MAT. 35.

PARAU A'ORAA A TO TATOU PEROPHETA

UA ino roa te ao nei. E ere hoi i te mea au roa te mau ohipa e tupu nei i teie tau. Te vai nei te pe'ape'a e te oto. Te faatupuhia nei te inoino i rotopu i te tahi mau nunaa o te ao nei, e te rahi atu nei te nounou, e te mau hinaaro tia ore, i roto i te aau o te mau taata.

Area râ, ahiri te mau tamarii a te taata nei i haapao i te Evanelia a te taata tei pohe no tatou, ia tia-faahou-mai tatou atoa mai te pohe maira, e ia noaa hoi ia tatou te ora mu-re ore, ua ora ê na to te ao nei i to ratou mau ati.

E pupu iti roa tatou i rotopu i te mau taata o te ao nei. E rave rahi te mau Ekalesia i nia i teie nei ao o tei parauhia i te i'oa o te mau taata tei faatia ia ratou. Ua tia mai te tahi mau taata rahi e te maitai hoi no roto mai ia ratou, e ua imi taua mau taata rahi ra i te mau ravea e maitai ai te oraraa o te mau taata, e te huru o te fenua i parahihia e ratou ra.

Aita râ to tatou nei Ekalesia i parauhia i te i'oa o te hoê taata no te mea aita te reira i faatiahia na roto i te paari o te taata nei. Na to tatou Metua i faatopa mai i te i'oa ra, *Te Ekalesia a Iesu Mesia i te Feia Mo'a i te Mau Mahana Hopea Nei*, i nia i ta'na Ekalesia ei faatura-raa'tu i Ta'na Tamaiti, ia Iesu Mesia.

A tia noa'i tatou i te uputa o te hoê tenetere apî, tei ia tatou nei, te mau melo no te Ekalesia a Iesu Mesia, te hopoia no te poro-haere-raa i te Evanelia i rotopu i te mau taata i nia i te mau fenua atoa o te ao nei, e ia na reira noa tatou e tia'i. E afai atu tatou i te mau parau o te Evanelia ia ratou, na roto i te aroha mau e te here, ia noaa atoa ia ratou te iteraa i te reira.

Aita roa i papu maitai te mau parau o te Evanelia i to te ao nei. Aita ratou i ite e, na roto ana'e i te haapaoraa i te mau ture o te here, tei haapiihia mai e te Fatu ra, e noaa mai ai te hau i to te ao nei. Mai te mea eita ratou e haapao i te mau parau a Iesu, ta'na i haapii mai, eita ihoa e noaa te hau ia ratou. I te tau o te Mesia, i to'na haereraa i rotopu i te mau taata ma'i, te mau taata tari'a turi e te mau mata po atoa hoi, noa'tu i te mau semeio ta'na i rave i rotopu i taua mau taata ra, aita i rahi te mau taata, i te reira tau, tei tia ia faaroo e, o Oia te tamaiti mau a te Atua ra.

No reira, i teie anotau apî nei, no te ite rahi tei noaa ia tatou i tia'i ia tatou, te hoê pupu iti, ia faaite atu i te toea o te mau tamarii a to tatou Metua i te ao ra e, eita roa te riri e te inoino e faatupu mai i te hau e te oaoa.

No te mea ua mau te mana mo'a i nia ia tatou, ua riro te haapiiraa'tu i te parau Evanelia, i to te ao nei, ei ohipa tumu e ei hopoia hoi na tatou. Ahiri to te ao nei i farii i taua parau Evanelia ra, ua ora ê na ia ratou i to ratou man pe'a-pe'a e to ratou mau tama'i. Tera râ, e tia noa ia ratou ia fa-

rii mai i te reira i teie nei â, e mai te mea e na reira ratou, e ore roa ia te pe'ape'a e te tama'i i nia i teie nei ao. No reira e mea tia ia tatou tataihoê ia haapii atu i te reira i to tatou mau taata tupu, na roto i ta tatou iho ohipa maitai. Ua tuuhia mai te reira i nia i te ao nei no te haamaitairaa e te faa-oaoa-raa hoi i te mau taata te haapao i te reira.

Te faaite haapapu atu nei au i te mau tane e te mau vahine hoi o te Ekalesia e, e hopoia rahi ta outou i te poro-haere-raa i te parau Evanelia i te mau fenua atoa, ia faaroo te mau taata atoa i te parau mau tei faaitehia mai i rotopu i te mau tamarii o to tatou Metua i te ao ra, na roto i te mana o te Autahu'araa. E poro-haere-hia te parau Evanelia i te tahi mau vahi apî, i teie mau matahiti i mua nei, no te mea aita â taua parau ra i tae i reira.

E oaoa rahi tei roaa mai i te mau tane e te mau vahine tei haapao noa i te mau hinaaro o to tatou Metua i te ao ra, e e rahi atu â te oaoa e roaa mai, ia tatou nei, mai te mea e tauturu maitai tatou i te tupuraa o te Ekalesia, i nia i te ao nei, i roto i teie tau Tenetere apî. Ia haere noa te Ekalesia i mua e tia'i.

Papaihia e: *Tihoti Arapera SEMITA*
Peresiteni no te Ekalesia a Iesu Mesia.

EDITORIAL

Mai te mea ua parau mai ihoa te Atua i te taata nei i to tatou nei tau, e mai te mea ua heheu mai ihoa Oia i te îraa o ta'na Evanelia mure ore, o te reira ia te ohipa tei hau roa'-tu i te faufaa i te mau ohipa atoa tei tupu i nia i te ao nei, mai te tau mai â o Iesu Mesia.

Eaha ia te ravea e ite papu ai tatou e, e parau mau te Eva-

nelia, e e mau peropheta mau Iosepha Semita e to'na mau mono? Ua tia anei te mau haapiiraa tumu a te Ekalesia?

Aita te Atua e hi'o i te huru o te taata. Te here nei Oia i ta'na mau tamarii paatoa nei e hope roa'e. E noaa i te taata tei haapao i te ture no te iteraa i te reira mau mea, taua ite ra no'na iho. Tirara te mea i titauhia mai ia tatou, te haapaoraa i te ture no te iteraa i te reira. Ua faataahia mai taua ture ra i raro nei:

1. Ia hinaaro i te ite papu e, e parau mau anei te Evanelia, e e peropheta mau anei Iosepha Semita e tia'i. E mea papu roa te reira. Ia ore tatou ia hinaaro i te ite papu atu i te reira aita ia tatou e haapao i te ture i faataahia no te iteraa i te reira mau mea.

2. E mea patuhia te ite-papu-raa i te hoê parau mau i nia iho i te haapiiraa. Ia ore to te taata ite papu i te mau haapiiraa tumu a te haapaoraa Momoni, aita ia e tia ia'na ia parau e, e parau mau, e a ore râ, e haavare. Eita ihoa e noaa i te mau taata tei ore i ite i te mau ohipa a Iesu Mesia, e i te mau parau ta'na i haapii mai, te ite-papu-raa e, e ohipa mo'a ta te Mesia. No reira ia haapii tatou i te mau parau o te Evanelia e tia'i. Ua na o mai Iesu e, "*A imi na outou i roto i te mau papairaa mo'a ra, o ratou ia tei faaite papu mai ia'u.*"

3. Ia haapao maitai tatou i te mau ture o te Evanelia e tia'i. E mea tia hoi ia ravehia ta tatou mau ohipa atoa mai te au i te faito o te Evanelia. Mai te mea ra eita tatou e haapao maitai i taua mau ture ra eita ia tatou e ite e, e haapaoraa mau e te tia hoi te reira. A haamana'o tatou i te parau a Iesu: "*E ere i ta'u ta'u e haapii nei, na'na ra, na tei tonono mai ia'u nei. O tei hinaaro maite i te haapao i ta'na ra hinaaro, e ite ia i ta'u e haapii nei e na te Atua, e na'u iho.*"

4. O te pure te ravea hopea i faataahia mai i roto i te ture no te iteraa i te reira mau mea. E ani atu tatou i te Atua ia faaite mai ia tatou, e parau mau anei, e a ore râ, aita anei. Na'na ia e haamaramarama mai ia tatou mai te au i to tatou

faaroo Ia'na ra. Ua papaihia te hoê parau a'oraa e Moroni, i roto i te Buka a Moromona, tei na ô mai e, "*O teie ta'u a'o ia outou na, ia itea teie mau parau ia outou, e ui atu i te Atua, i te Metua mure ore, i te i'oa o Iesu Mesia e, e parau mau anei teie mau parau, e aore anei; e ia ui atu outou ma te aau hinaaro mau, ma te mana'o papu, e ma te faaroo i te Mesia, na'na ia e faaite mai i te parau mau ia outou na roto i te mana o te Varua Maitai. E na roto hoi i te mana o te Varua Maitai e ite ai outou i te parau mau i te mau mea atoa ra.*"

Ua parau ihoa mai te Atua ia tatou i teie nei tau. Ua faa-ho'ihia mai te îraa o te Evanelia i nia i te ao nei. E peropheta mau Iosepha Semita na te Atua. O Tihoti Arapera Semita ra, o to tatou ia peropheta i teie nei mahana, e te parau mai nei te Atua mana hope i to'na feia mo'a na roto ia'na ra. E parau mau te reira mau mea. Aita roa tatou i pee atu i te aamu a te taata.

E noaa i te mau taata atoa o tei haapao i te mau ravea e maha, tei faaitehia i nia nei, taua ite ra no ratou iho, no te mea te na reira maira te Atua, e eita roa Oia e haavare mai i ta'na mau tamarii. Aita te Feia mo'a o te Ekalesia a Iesu Mesia i haavarehia. Ua noaa ia ratou te ite-papu-raa i taua mau mea ra. Na te Atua hoi i heheu i te reira ia ratou.

E HAAPIIRAA

TE HAERERAA MURE ORE O TE TAATA I MUA.

Te faaite mai nei te papairaa mo'a i te parau no te hoê apooraa rahi tei faaterehia i te ao varua ra hou te taata i tuuhia'i i nia i teie nei ao. E teie apooraa, o tei parauhia te apooraa rahi i te ao ra, ua faaterehia ia e te Atua, to tatou Metua mure ore, e o ta'na mau tamarii, te mau tamarii ta-

maroa e te mau tamahine tei parahi i roto i taua apooraa rahi nei, o te hoê ana'e paha ia o te mau apooraa ra tei faate-rehia i taua vahi varua ra. I roto i teie apooraa ra, ua apoo ratou no nia i te ohipa ta to tatou Metua mure ore i mana'o no ta'na ra mau tamarii, e no te faufaa rahi o te mau ohipa i faaotihia e taua apooraa rahi ra, i faaite atu ai te Atua i te tahi mau tufaa e te faufaa rahi no te reira, i ta'na mau pe-rophetai nia iho i teie nei ao.

O te haereraa mure ore o te taata nei tei apoo-maite-hia i reira, e te faaiteraa hoi i te opuaraa rahi no te ora i mua i te amuiraa varua, o na tumu rahi ia no taua mau apooraa rahi ra i te ao varua ra.

I te mau ture mure ore, o te ture no te haereraa i mua o te taata nei tei hau atu, no te mea e tufaa ana'e te mau ture atoa no taua ture rahi ra. Ua roaa i to tatou Metua mure ore to'na tiaraa teitei, e to'na hoi Atuaraa, na roto i to'na haapaoraa i taua ture rahi ra no te haere-noa-raa i mua. E ua roaa hoi to tatou iho vahi maramarama na roto i to tatou haapaoraa i taua ture ra, e na roto ana'e i to tatou haapao-noa-raa e haere noa'i tatou e tae noa'tu te roaaraa mai ia tatou to tatou iho tiaraa teitei.

TE OPUARAA RAHI.

O te Atua, te Metua mure ore, te faatere i reira, tei ia'na te ite, te maramarama e te mana tei hau a'e i to te amuiraa paatoa. E ua hinaaro Oia ia roaa atoa, i ta'na mau tamarii varua, te hoê tiaraa hanahana tei aifaito i to'na iho. Ua oti ta ratou ohipa no te ao varua e ua ite te Atua e eita ta'na opuaraa, no ta'na mau tamarii e oti maori râ e tuu Oia ia ratou i nia i te hoê ao tahuti noa. E heheu ia Oia i te Evanelia ia ratou i reira, mai te horoaraa'tu i to ratou iho tiamâraa

ia ratou, ia tia ia ratou ia farii, e aore râ, ia patoi i te mau parau mure ore ta'na e heheu ia ratou. E e faautu'ahia te mau taata atoa mai te au i to ratou haapaoraa, e a ore râ, i to ratou haapao-ore-raa i te mau ture e te mau oro'a o te Evanelia. E mea na reira to te Metua mure ore faaiteraa'tu i te amuiraa i te mau huru o te oraraa tahuti noa e te opuaraa rahi no te ora.

UA FAATUMUHIA I NIA I TE TURE.

Te opuaraa ta te Atua i mana'o no te faa aratai raa i te mau tane e te mau vahine i ta ratou iho ohipa i nia iho i teie nei ao, ua faatumuhia ia i nia i te mau ture mure ore tei vai noa mai te matamua e te vai â hoi e a muri noa'tu. E no te mea ua haapaohia te mau mea natura na roto i te ture, na te reira e faaite mai ia tatou e, ia haapaohia te mau mea maramarama e te mure ore na roto i te ture e tia'i. Hoê â te tahi pae rahi o te mau ture, i raro nei, i tei haapaohia i te ao varua. E mea na reira to te Evanelia faa-tumu-raa-hia i nia i te niu o te parau mau mure ore.

O teie te tahi tufaa o te mau ture i tuuhia mai i te taata nei, e te mau taata atoa tei tae mai i nia iho i teie nei ao, oia hoi, te faaroo, te tatarahapa, te bapetizoraa, te tuuraa rima, te here, te aroha tauturu, te viivii ore, te itoito, te raveraa i te ohipa e te haapaoraa parau tia i te mau taata atoa. Te vai atura te mau ture e te mau oro'a e rave rahi no te Evanelia mure ore.

TE VARUA MAITAI E TE VARUA O TE ATUA.

Ua faataa te Atua i te Varua Maitai ei ravea ia au te taata i te taatoaraa o to te ra'i ra, e ia roaa mai hoi te ite rahi no'na ra. Ua faataa-atoa-hia te Varua o te Atua ra e faa-aratai-raa i te taata, e ei tautururaa hoi i te taata tei ore i farii i te Va-

rua Maitai, i te Atua mure ore, ia tia atoa ia ratou ia farii i te maramarama e te ite no ô mai i te Toru-tahi ei tauturu-raa no ratou i nia iho i teie nei ao.

Ua na ô maira Iosepha Semita te Peropheta, *E mea horoahia te mau parau mau atoa na roto i te mana no te Autahu'araa, oia hoi, e horoahia te Autahu'araa i te taata nei, e na roto i te reira te Atua e heheu mai ai i to'na ra hinaaro i te taata tahuti nei.* Ua na ô faahou maira te Peropheta, *Tei te Autahu'araa Melehizedeka te mau taviri no te Basileia o te Atua i te mau tau atoa o te ao nei, mai te matamua mai â e tae noa'tu i te hopea o teie nei ao. O te ravea ia no te horoaraa i te mau ite, te mau haapiiraa, te opuaraa no te ora e te mau mea atoa e heheuhia mai, mai te ra'i mai.* Ua na mua a'e to'na faatiaraahia i te faa-tumu-raa hia o teie nei ao, o te Autahu'araa teitei ia i te haapaoraa a te Tamaiti a te Atua ra.

TE POHERAA MATAMUA O TE VARUA.

Teie te hoê tufaa o te opuaraa rahi, oia hoi, ia haere mai te mau varua i nia iho i teie nei ao ma te haa mana'o ore i to ratou huru matamua. Te tumu no teie mo'eraa o teie ia, oia hoi, ia aifaito te huru o te mau taata atoa o te fanauhia mai i nia iho i teie nei ao, ia haere ra te mau tamarii tahuti a te Atua na roto i te faaroo, e na te reira e faatupu i te itoitoe e te mata'u ore o te taata nei. Ua na reira te Metua mure ore i te tuu i ta'na mau tamarii i nia iho i teie nei ao tahuti, ia mo'e ia ratou to ratou huru matamua, maori râ, te hoê mau tufaa nainai ta te Atua i hinaaro i te faaite mai. E riro atoa ra te taata i te pohe i te pohe o te tino nei.

IA FAATAAHIA TE HOÊ FAAORA E TIA'I.

No teie poheraa tei vai i nia'e i to te ao taatoa nei, ia faataahia te hoê Faaora no ratou e tia'i. No reira ua maiti te Atua i te hoê a ta'na ra mau tamarii ei Faaora, ei ve'a e ei

faatere parau tia no te rave i te ohipa a te Metua ra. E ohipa aroha ta'na i rave no te haapii atu i taua mau tamarii nei, ia ore hoi ratou ia vai maua noa i roto i to ratou mau ati, ia haapao râ ratou i te Evanelia ta'na i horoa mai. O Oia atoa te taraehara tei ofati i te mau ruuruuraa no te pohe, ia tuati-faahou-hia te Varua i te tino o te mau taata atoa tei tae mai i nia iho i teie nei ao e hope roa'e. O Oia tei parauhia te maramarama, te parau mau e te ora hoi no to teie nei ao. Area râ na roto ana'e i to'na i'oa e ho'i faahou ai te taata i mua i te aro o te Metua mure ore. No reira Oia i parauhia'i to tatou Faaora, to tatou Atua.

TE MAITIRAA I TE FEIA FAATERE.

A tia'i te Atua i roto i te apooraa rahi no ta'na mau tamarii varua i te ra'i, ua maiti Oia i te mau faatere no to ratou faaeearaa i nia i te ao tahuti. I rotopu ia ratou te vai ra te hoê mai te Atua te huru, e ua maiti te Metua mure ore ia'na ei mono no'na e ei Faaora no ta'na mau tamarii. No te maitai o taua tamaiti ra e no te haehaa hoi o to'na ra aau i maitihia'i oia. E ua pahono oia i to'na maitiraahia ra, na ô atura i to'na metua: *To'u Metua, e haapaohia to oe hinaaro e no oe te hanahana e a muri noa'tu.* E taua tamaiti ra o Iehova ia o te Faufaa tahito e o Iesu hoi ia o te Faufaa apî, a ora'i oia i roto i te tino tahuti nei ra.

Ua maiti-atoa-hia te mau peropheta tahito, mai ia Adamu, Enoha, Noa, Aberahama e te mau peropheta e tae noa mai i te mau peropheta no teie tau hopea nei, oia hoi, o Iosepha Semita, Birikama Youne, Ioane Tela, e te mau peropheta o te Ekalesia e tae roa mai ia Tihoti Arapera Semita, te auvaha no te Atua i teie tau. Ua maiti atoa te Atua ia Maria ei metua vahine no ta'na tamaiti fanau tahi i nia i teie nei ao. E ua faataa atea Oia ia ratou no ta ratou mau ohipa.

E tuatihia teie nei parau i te ava'e i mua nei.

TE TURE NO TE FAAORERAA I TE HARA A VETAHI Ê RA

I te taime i horoa mai ai te Faaora i te pure i papaihia i roto i te Mataio, i te pene ono, ua na ô maira Oia e: “ *E faaore mai i ta matou hara, mai ia matou atoa e faaore i tei hara ia matou nei.*” I te otiraa o te pure ua na ô atoa mai Oia e, “ *Ia faaore hoi outou i ta vetahi ê ra hapa, e faaore atoa mai to outou Metua i te ao ra i ta outou. Ia ore râ outou ia faaore i ta vetahi ê ra hapa, e ore atoa to outou Metua e faaore mai i ta outou hapa.*”

E mea tia ia tatou ia rave noa i te mau ohipa e au i te Atua, ia farii-noa-hia tatou e ana ra. Mai te mea e rave tatou i te hara eita ia tatou e fariihia e te Atua, e eita atoa tatou e farii-faahou-hia e tae noa'tu i to tatou tatarahaparaa, e to tatou faa-afaro-raa i ta tatou mau ohipa.

E ere i te mea tia ia tatou ia inoino atu i te hoê taata, noa'tu e ua hara mai taua taata ra ia tatou. Ua faaite papu mai te Fatu e, mai te mea ua tupu te peapea i rotopu ia tatou e te tahi atu mau taata, ia faa afaro e ia faa hau tatou i te reira pe'ape'a e tia'i hou tatou e tae atu ai i mua i to'na aro. Ua na ô maira Oia: “ *E teie nei ia hopoi oe i ta oe tao'a horoa noa i te fata ra, e ua mana'o i hora oe i reira, e e hara ta to taeae ia oe na; e mata na i te haere e faite i to taeae, a haere a hopoi ai i ta oe tao'a.*”

E ture mo'a te reira. E haapiiraa tumu atoa ia no te Evangelia a Iesu Mesia. O teie hoi te ture matamua, oia hoi, ia here atu tatou i te Atua ma to tatou aau atoa; te piti ra, ia here atu tatou i to tatou mau taata tupu mai ta tatou i here ia tatou iho. E nahea e tia'i ia tatou ia here atu i to tatou mau taata tupu ra, mai ta tatou i here ia tatou iho, mai te mea e inoino atu tatou ia ratou? E mai te mea aita tatou e

here atu i to tatou mau taata tupu ra, nahea ra tatou e here atu ai i te Atua?

E mana'o paha tatou e, e mea fifi ia faaore noa i ta ratou mau hapehape, e ta ratou mau hara, na roto i te hereraa ia ratou, tera râ e tia noa ia na reira. E tamata paha te reira i to tatou faaroo, mai te mea râ e tia ia tatou ia faaore atu i ta ratou mau hara i roto i to tatou mau mana'o, e noaa ihoa ia te oaoa ia tatou no te reira. Ua faaite mai loane Tera i te parau a te peropheta ra o Iosepha Semita i te na ô ra mai e, "*Ia tamatahia outou e tia'i, mai ia Aberahama i tamatahia ra, e te mau taata atoa hoi o te Atua, e na te Atua e imi ia outou, e e rave mai Oia ia outou, ma te huti i te taura tapea o to outou mau aau, e mai te mea eita e tia ia outou ia faaoromai i te reira, eita outou e riro ei mau Fatu tia no te Basileia Tiretiera.*"

I roto i te mau papairaa mo'a ra, no teie anotau nei, ua haapii maira te Fatu ia tatou ia faaore atu i te hara a te mau taata atoa. E faaore atu Oia i te hara a te taata ta'na iho i mana'o, ia tatou nei râ, ua titauhia tatou ia faaore atu i te mau hara a te mau taata atoa, noa'tu i te huru o taua mau hara ra.

Te vai ra vetahi mau taata tei inoino noa i te hoê taata na roto i te mau matahiti e rave rahi. Te vai ra hoi te tahi tei harahia e te hoê taata faatere no te Amaa, e no te reira ua faaea ratou i te haereraa i te mau pureraa. Ua riro taua mau pe'ape'a ra ei faatoparaa ia ratou i roto i te ino. No te aha? No te mea aita ratou i haapao i teie ture no te faaoreraa i te hara a vetahi ê ra. Aita roa ratou i faaore i te hara a te taata tei hara mai ia ratou ra, no reira i tupu ai te inoino e te pe'ape'a i roto i to ratou mau aau e aita i tia faahou ia ratou ia here atu i taua taata ra. O vai ra tei hape i reira? O te taata tei ore i haapao i te ture no te faaoreraa i te hara a

vetahi ê ra, tei hape i te reira vahi, e mai te mea eita oia e faaore atu i taua mau pe'ape'a ra, ia tia ia'na ia here atu i to'na mau taata tupu, eita ihoa e noaa ia'na te parahiraa tei-tei i roto i te Basileia matamua o te Atua.

Te vai atoa ra te mau tamarii o tei riri atu i to ratou na metua e no reira aita ratou i paraparau faahou ia raua. Ua faaite râ ratou i te parau faaino no nia i to ratou na metua i te tahi mau taata, e ua riro te reira ei faarahiraa i te pe'ape'a e te inoino i rotopu ia ratou. E no te aha i tupu mai ai taua mau mea ra? No te mea aita ratou i haapao i teie ture no te faaoreraa i te hara a vetahi ê ra.

Te vai ra hoi te mau metua o tei riri atu i to ratou mau tamarii e aita â taua pe'ape'a ra i hau e tae roa mai i teie nei â. No te aha? No te mea aita ratou i haapao i teie ture no te faaoreraa i te hara a vetahi ê ra.

Eiaha ia mo'e ia tatou e, e ture rahi teie ture no te faaoreraa i te hara a vetahi ê ra, na te Ekalesia nei. E mea tia roa ia tatou ia faaore atu i te hara a te mau taata tei hara mai ia tatou, ia tia ia tatou ia tiaturi e, e na reira atoa mai te Atua i te faaoreraa i ta tatou iho mau hara.

Papaihia e: Tihoti Orometua.

PARAU FAAITE NA TE PERESITENIRAA MISIONI

Ua neneibia te hoê ARATAI no te mau taata faatere i roto i te Pupu Feia Apî. Na te reira buka e faaite i te huru no te faatereraa i te mau ohipa apî i mana'ohia no te Feia Apî i te mau Amaa, i roto i teie Misioni nei.

O teie te parau faaite na te Peresiteniraa Matamua no te Ekalesia i te Amuiraa Eperera 1941:

“ O teie te tumu i faatiahia'i te Pupu Feia Apî, oia hoi, ia

tanu atu e ia faatupu hoi i te faaroo i te Mesia, e i ta'na Evanelia, i roto i te aau o te Feia Apî, ia noaa ia ratou te ite-papu-raa e, e Peropheta mau o Iosepha Semita, e o teie ihoa te Ekalesia mau a te Mesia i nia i te ao nei. Na te reira ite e faatupu i te hinaaro i roto i te Feia Apî ia haapao maitai i te mau ture e te mau faaueraa o te Evanelia nei."

Mai te taime i faatiahia'i te Pupu Feia Apî Tane, e te Pupu Feia Apî Vahine e Birikama Youne, ua tamata noa te mau taata faatere o taua na pupu ra i te faatupu i teie na ohipa e piti:

Te matamua ra, ia faatupu i te faaroo mau i te Evanelia a Iesu Mesia tei faaho'ihia mai i roto i teie tau hopea nei.

Te piti ra, ia faatupu i te tahi mau ohipa faa-arearea-raa, e au no te Feia Apî, no te faa-anaanatae-raa e no te faa-ito-ito-raa hoi ia ratou ia rave i te ohipa maitai a te Atua ra.

Te tamata atoa nei tatou i te faatupu i taua na ohipa ra, no reira, te ani atu nei matou i te mau melo atoa, e i to tatou mau hoa hoi no rapae tei parahi i pihaiho i te hoê Amaa no te Ekalesia; ia tauturu maitai i te mau taata faatere no te Pupu Feia Apî na roto i to outou haereraa i te mau haapiiraa na te Feia Apî, e na roto hoi i to outou haapaoraa i te mau ture i faataahia no te ohipa faa-arearea-raa a te Feia Apî.

Papaihia'tu e te Peresiteniraa Misioni

É. Bentley Mitchell Jr. (Mitiela)

Ray T. Wilcox (Re)

George E. Magnusson (Tihoti)

»»»»»««««

O teie te piti o ta tatou ve'a. Ua haamata-faahou-hia te reira i te ava'e Novema, e ua opere-haere-hia hoi i te mau melo no te Ekalesia e i te mau taata i rapae atoa hoi tei hoo i te reira i te matahiti 1940. Te na reira-atoa-hia nei i teie ava'e; aita e moni i titauhia no te reira. Tera râ, i te ava'e Tenuare no te matahiti apî, e opere

hia te Heheuraa api i te mau taata ana'e tei hoo mai i te reira na roto i to ratou haponoraa mai i te parau hooraa ve'a, e te moni, i te Fare Orometua i Papeete nei. No reira, ia hinaaro outou i 'Te Heheuraa api' i teie matahiti i mua nei, a haponu mai i te 'Parau hooraa ve'a' e itehia i roto nei, e te moni no te mau matahiti tei tapaohia, i te Fare Orometua Momo ni i Papeete nei.

TE HAERE NEI TE EKALESIA I MUA

Te Amuiraa Atopa i Takaroa.

Ua tere atu Mitieia Peresiteni, raua o Tihoti Peresiteni, i Takaroa no te Amuiraa Atopa, tera râ, no te pahi ore, aita raua i tae atu i reira no te mau mahana i faataahia no te Amuiraa e ua na muri raua i te Amuiraa. Area râ i te 10 no Atopa ua faatupu-faahou-hia te mau ohipa no te amuiraa, e e mea nenenehe roa te mau ohipa i ravehia i reira, mai te mau a'oraa na te tamarii, e tae noa'tu i te pupu himene. Hoê ahuru ma ono taata tei maitihia no te himeneraa i roto i taua pupu ra. Ua himene maira ratou i na himene navenave e piti,

I te tahi mau po i roto i te hepetoma ua faaterehia te machine cinema a te Ekalesia. E mea mauruuru roa na to Takaroa ia ite i te mau hoho'a i faaterehia i Papeete, oia hoi, te hoê hoho'a mau tei tavirihia i roto i teie tama'i hopea nei, e te hoho'a tei faaite i te tereraa o te hoê tamaiti, e 21 to'na matahiti, tei faaati i te ao nei na nia i to'na poti nainai.

A faaea'i raua i Takaroa ua haamatahia te mau ohipa apî i mana'ohia no te Feia Apî. I te po raua i faarue atu ai i Takaroa, no te ho'i mai i Papeete, ua faatupu te mau taata faatere no te Pupu Feia Apî i Takaroa i te hoê oriraa. Ua faa-nehenehe-roa-hia te fare putuputuraa i te mau tiare, e ua hamani-atoa-hia te mau faraoa monamona no taua ohipa ra. E mea maitai e e mea nehenehe hoi te mau ohipa i ravehia i reira.

Ua haere atoa raua, e te hoê pae o to Takaroa, i Gake no te hoê picnic e no te hi'opoaraa hoi i te mau vahi i reira, ia itehia te hoê vahi maitai ei tiaraa no te hoê fare putuputuraa apî e faatiahia i reira.

I to raua ho'iraa mai i Tahiti, ua fati roa na auri pererau o te pahi ra o *Taurua*. Ua painu noa ratou fatata e maha ahuru hora hou ratou i itehia'i e te *Vaihinano*. Noa'tu i te mata'i e te miti rahi ua ho'i atu te tahi mau mataro i Makatea, na nia i te poti nainai, no te taniuniuraa i Papeete. E ua tonohia o *Vaihinano* no te haere e tavere mai i te *Taurua*. Ua tae mai ratou i Papeete i te 26 no Atopa.

Ohipa Basketball i te fenua Baratane.

Ua riro faahou te rê Basketball no te fenua Baratane i te Pupu Basketball no te mau Orometua Momoni.

I te 26 no Tiunu i teie matahiti nei ua faaotihia te haruraa rê Basketball, e ua riro taua rê ra i te pupu no te Orometua Momoni na roto i to ratou haavíraa i te Pupu no Wales i te ahiahi o taua mahana ra, e na roto hoi i to ratou haavíraa i te pupu no te fare Haapiiraa Teitei ra o Oxford, i te po. E 59-27 te tai'oraa o te hautiraa matamua i te pupu no Wales e e 50-38 te tai'oraa o te hautiraa hopea tei faariro i te rê i te pupu Orometua Momoni. O te toru te reira o te mau rê basketball tei noaa i te pupu basketball no te mau Orometua i taua fenua ra. E vaiiho-noa-hia te au'a i horoahia ia ratou no ta ratou rê basketball i roto i te fare Orometua i London, te oire pû no te fenua Baratane ra, e tae noa'tu i te paura o te pupu basketball no te mau Orometua Momoni i te tahi pupu i teie mau matahiti i mua nei.

Ohipa poro-haere-raa Evanelia, a na Orometua, i te fenua Farani.

I ô, i te fenua Farani, ua imihia te tahi mau ravea apî no te poro-haere-raa i te Evanelia i reira. Ua faataahia na Orometua e piti no te afairaa i ta raua mori turuma hoho'a, e ta raua machine faa-ta'i-raa pehe himene, i na oire e 20 i te mau fenua Farani, Suiti e Peretita atoa hoi. E mau hoho'a ta raua no nia i te faatiaraa o te Ekalesia i teie tau hopea nei, e e mau pehe faa-ta'i-raa hoi ta raua no te pupu himene rahi a te Ekalesia tei himene mai i ta ratou mau himene i roto i te fare menemene i Roto Miti, Utaha.

Te Amuiraa Rahi i Purutia.

I Berlin, te oire pû no te fenua Purutia, ua putuputu mai e 6.000 taata no te Amuiraa rahi a te Ekalesia. Tei raro a'e taua Amuiraa rahira i te faatere-raa o Alama Sonne, te hoê tauturu no te Tino Ahuru ma Piti. O oia te Peresiteni no te mau Misioni a te Ekalesia i te feua Europa. Tei reira atoa o Walter Stover, te Peresiteni no te Misioni i Purutia.

No te rahiraa o te mau taata tei tae i taua amuiraa ra ua faaterehia te mau pureraa i roto i te hoê aua hautiraa tei faatiahia e Hitler, i te matahiti 1936, no te *Jeux Olympiques*.

Te vai ra te mau fifi e rave rahi tei haape'ape'a ia ratou, a faatupu ai ratou i taua amuiraa ra. No te tama'i aita i rahi te mau hotela, e te mau fare tipaeraa i Berlin i teie nei, e aita atoa i rahi te maa i reira. No reira e mea fifi roa ia imi i te vahi faaeearaa no te mau taata tei tere i Berlin no taua amuiraa ra. Na roto râ i te itoitio o te Feia Mo'a i reira, e na roto hoi i te tautururaa a te Afua ia ratou, ua manuia ratou e ua faatupuhia ihoa taua Amuiraa rahi ra.

Te Hiero apî e faatiahia i Tarafonia.

I teie mau ava'e i mairi a'enei, ua haere atu o Tihoti Arapera SEMITA, Peresiteni no te Ekalesia nei, i te tufaa fenua Tarafonia, i Marite, no te hi'opoaraa i te fenua i hoohia mai e te Ekalesia ei vahi tiaraa no te hoê hiero apî e faatiahia i reira. Ua farerei atoa oia i te Tavana oire no Los Angeles, te oire e faatiahia'i taua hiero apî ra, no te haa-papu-raa e, eita e faatiahia te tahi mau fare raveraa ohipa, e a ore râ, te tahi fare nehenehe ore i nia i te mau vahi i pihaiiho i te fenua i hoohia e te Ekalesia.

Te parahi nei e 75.000 melo no te Ekalesia nei i roto i te oire ra o Los Angeles, no reira i maitihia'i taua oire ra ei vahi tiaraa no te hiero apî. Ia oti teie hiero apî ra e riro te reira i te iva o te mau hiero a te Ekalesia. E maha hiero to te tufaa fenua ra o Utaha, hoê to te tufaa fenua ra o Idaho, hoê to te tufaa fenua ra o Arizona. Te vai ra te tahi i Canada, e te vai ra hoi te tahi i Hawaii. Te mana'ohia nei e, e pau hoê milioni tara, moni Marite, i te faatiaraa i taua hiero apî ra i Tarafonia ra.

Te Aroha Mau.

I teie matahiti nei ua faaapu e ua haponu atu te mau melo no te Ekalesia, i te fenua Holland, e 66 tane umara putete i to ratou mau taeae e to ratou mau tuahine hoi no te Ekalesia tei parahi i te fenua Purutia, ei maa na ratou. Te maere nei te tahi mau taata no teie tao'a aroha na to Holland i to Purutia no te mea na te Purutia i faatupu i te mau ati o te tama'i i nia ia Holland i roto i teie tama'i hopea nei. Aita râ te mau melo i Holland i haapao i te reira, ua haapao noa râ ratou i te ture o te Ekalesia, e i teie nei ua riro ta ratou ohipa ei tapao no te here te vai nei i roto i te mau melo no te Ekalesia.

E Vahine Paari Mau.

Ua fanauhia mai o Julia Ann EVANS hoê hanere matahiti i mairi a'enei, i te 21 no Tiurai i te matahiti 1848. O oia te hoê o te mau taata matamua tei tae i Roto Miti, i Utaha ra, i pihaiiho ia Birikama Youne ma. Te haa-mana'o noa nei â oia i te mau mahana pe'ape'a no te Feia Mo'a i te oire ra i Navu. Ua ite atoa oia i te tupuraa o te oire Roto Miti, mai to'na nainairaa e tae roa mai i to'na rahiraa i teie matahiti nei. Te itoitonoa ra to'na tino noa'tu i to'na paari. Aita â oia i ruau roa.

I te 21 no Tiurai no teie nei matahiti ua putuputu mai to'na huaai i Roto Miti no te faatupuraa i te hoê oro'a haamana'oraa i to'na mahana fa-nauraa no te mea hoê hanere to'na matahiti i teie nei. Teie te rahiraa o to'na huaai: e pae tamarii e ora nei, e toru ahuru ma hitu mootua e e hitu ahuru ma hitu hina, e ia amuihia, hoê hanere hoê ahuru ma iva ia huaai.